

Meje Po Carte Cotacaya Pablo Tatina, Timoteo Tatinatsi

*Meje yabara poxonae Pablo tamropata pitaba xua tatina,
Timoteo tatinatsi*

¹ Jaco Timoteo, xan Pablon, Cristo Jesús pia peitorobi jiwi jiwana tatsin. Nacom neitoroba poxoru bapon baxua peichichipaewa. Xan Cristo Jesús pia peitorobi jiwi jiwana tatsin, tsipei Nacom bayatha peexanaexae pocotsiwa bayatha tsiyabara wūnae muxu duta jiwitha. Po peyabara tsiwūnae muxu dutsiwa, xua Nacom catsina jiwitha peajuntuyapusūwa, po peajuntuyapusūwa ataya tsiteca. Barapo peajuntuyapusūwa jiwi catsibeibinchi poxonae jiwi jume cowunteibina Cristo Jesús. ² Xam, Timoteom, barapo carte cata tinatsi, xam be taxantom catsicotainchi. Xam bichocono caantobetsi. Ichichipan xua Nacom pon Waxa, irū Jesucristo, pon Wanacanamataxeinaein, baraponbe barabū amanayiya cayawenaenabe pia necaantobexaebe. Matautano baponbe nantanuweya cayabara nanta xeinaenabe pia necayawenaenexa tsanebe. Matautano ichichipan xua baponbe jūntema popona caexanaena.

*Meje yabara xua Pablo yabara paeba xua Timoteo bewa
jume cowūnta ducuaenaebiyaena*

³ Poxonae Nacom tsipaebeiban jan tsaibinje: “Nacom, maisa jūntū coyene weiweinan xua Timoteo neyawenaewam”, jan tsaibin. Barapon Nacom tanacuitan, tsipei tajūntū coyene netsipaeba xua pinae bara beta exanan. Barichi tamo susato jiwi tanacuita barapon Nacom. ⁴ Xam cayabara nanta xeineibatsi xua poxonae matha cain bichocono nesiwa wecoyam poxonae cacuenta warapatsi.

Maisa be cataeinchi merawintha, yawa maticabintha xua bichocono tajuntũ coyene weiweinaewa tsane. ⁵ Xan nanta xeineiban xua xam bara xaniwaicha beta jume cowuntsiya poponame Nacom. Po pejume cowuntsiwa xam Nacom tsita xeiname, barapo pejume cowuntsiwa copiya matha acue Loida, irũ ena Eunice Nacomtha tsita xeinabe, beya poxonae xam irũ jume cowuntame. Bara beta yaputan xua xam irũ barapo pejume cowuntsi coyenewa Nacom tsita xeiname anoxuae.

⁶ Daxota catsipaebatsi, beta najuntũ coyene tsacabare, xua yabara nanta xeiname po cui coyenewa Nacom cacata xua po cui coyeneyatha xua xanepanaya neexanae ducua-naebiyaenexa pocotsiwa Nacom caitoroba. Barapo cui coyene bayatha Nacom cacata poxonae canta jayabatsi. ⁷ Tsipei Nacom poxonae naca cata pia Pejumope tũnaxũ tatsi, barapo pejumope tũnaxũ tatsi jopa jiwi junuwa cana exanaetsi. Jame Nacom naca cata barapo pejumope tũnaxũ tatsi, xua waxeinaewa tsane peayapusũ itorobi coyenewa. Matautano Nacom naca cata barapo pejumope xua waxeinaewa tsane po cui coyene peantobe coyenewa xua watsita xeinaewa tsane Nacom matautano xuano jiwithano. Matautano Nacom naca cata barapo jumope xua waxeinaewa tsane po cui coyene beta penayabara nanta xeinae coyenewa xua beta peexanaewa tsane. ⁸ Jopa aurande poxonae yabara cueicueijam Jesucristo, pon Wanacanamataxeinaein, xua poxonae bequein ichamonae cacui capona. Matautano jopa neyabara aurande xua jiwi pecũbi botha taecaewa. Baxua necana exana tayabara cueicueijeixae Jesucristo, xua jiwi catsawiya taneyabara nanta xeinaexae xua pinae abe exanan. Cui barũ jejande xua ichamonae bara canthũthũ jopojopeya atene exana, icha xan ichin xua yabara cui copatan xua bara ichamonae atene tana neexanaewa tsane. Baxua cacana exana neyabara cueicueijeixae Nacom pia pex-

einya diwesi jume. Nacom cacata peayapusuwa baxua nexa, xua jopa nejunuwiwa tsane poxonae caatene exana. ⁹ Nacom naca capanepa abe waexanae cuiuru coyenein weya. Matautano Nacom naca waba xua Nacom watsita najuntu coyene xanepana exanaewa tsainchi. Apra jopa naca wabiyo poxoru xanepanaya waexanaexaetsi. Apra jame naca waba, tsipei caena bayatha yabara nanta xeina baxua, beya poxonae forota barapo cae pin nacue xua amanayiia pia wanaca yawenaetsi pia wanaca antobexae. Nacom naca yawena caemonae peburuya wanabarū jinompaexae Cristo Jesustha. ¹⁰ Nacom naca tsita ituta pia peantobewa poxonae itorobicatsi Jesucristo, pon Wanacacapanenebiyaen. Bapon weraweraca cana exana po peayapusuwa xua xota jiwi tupa exanatsi. Matautano naca tsita ituta po coyenewatha xeinatsi peantuyapusuwa, po peantuyapusuwa ataya tsiteca wajume cowuntsixae Nacom pia pexeinya jume diwesi tatsi, po diwesi xua Jesucristo yabara.

¹¹ Nacom newaba xua tacueicueijeinexa barapo pia pexeinya diwesi jume tatsi. Matautano neitorobano xua tana necana exanaenexa Jesucristo pia peitorobi jiwi jiwana tatsin xua tacuidubinexa pomonae jopa judiomonae naexanaeyo. ¹² Taexanaexae baxua, daxota atene nexana ichamonae. Daichitha jopa aurinyo xua tayabara cueicueijeiiwa Cristo, poxonae bequein ichamonae atene neexana, tsipei yaputan pontha pon tajume cowuntsixae xua peitacupaewatsi xua tana neyawenaewa. Bara beta yaputan xua bapon xeina peayapusuwa xua tana neyawenaewa. Bapon neyawena xua tacueicueijeii tsurucua-naebiyaenexa tsane pocotsiwa bayatha bapon neitoroba, beya poxonae barapo matabi tsane, po matabitha poxonae patopeicaena Jesucristo.

¹³ Necui coyene jupaeya exana ducua-naebiyama, po pecuidubiwa bichocono xanepana xua bayatha catsipae-

batsi. Jume cowũntsiya poponare, matautano antobeya poponde Nacom, irũ jiwithano, caemonaeya peburũya wanabarũ jinompaexae Cristo Jesustha. ¹⁴ Cateiteichiya yawa muxuna poponde pexainyei coyenewa, po pexainyei coyenewa Nacom pia Pejumope tũnaxũ tatsi cacata, po pejumope tũnaxũ tatsi naca barũ jinompa.

¹⁵ Bayatha yaputaneme pomonae Asia nacuatha jinompa daxita barapomonae nepunapenta. Pomonae nepunapenta, barapomonae jiwana ichũn pewũn Figelo, ichũn pewũn Hermógenes. ¹⁶ Barabũ Nacom pon jiwi Pecanamataxeinaein yabara nantanuweya nanta xeinaena pomonae Onesiforo piamonae tatsi, xua Nacom peyawenaewa tsane barapomonae. Bapon Onesiforo ne-jũntũ tsacaba poxonae beta xanepanaya neyaweneiba. Bapon jopa neacauriyo xua jiwi pecũbi botha taecaewa. ¹⁷ Poxonae bapon patopa Roma tomaratha bapon matowa newenawenei tsurucuanaebiya beya poxonae matapainya necaxina. ¹⁸ Barabũ Nacom pon jiwi Pecanamataxeinaein, bapontha nantanuweya yabara nanta xeinaena peyawenaenexa tsane, poxonae po mataqueitha Nacom yabara paebina jiwi xua penatsicuentsiwa xua abe peexanaexae. Xam yaputaneme bara, xua bapon neyawena nawita Efeso tomaratha.

2

Meje yabara xua Pablo yabara paeba xua ponba beta tanacuita pia pecanamataxeinaeinchi

¹ Xam Timoteom, be taxantom catsicotainchi. Najũntũ coyene cui tsacabare xua nenanta xeinaenexa xua Nacom amanayiya jinya necayawenaewa tsane pia necaan-tobexae. Nacom baxua cata exana caemonaeya peburũya jinya nenaexanaexae Cristo Jesustha. ² Pocotsiwa xua bayatha nejume taneme xua cueicueijan pin bicheito

itabaratha, bapocotsiwa xuya cuidubare pebiwitha, po pebiwi xua xuya jume cowuntsiya xaniwaicha cuidubina ichamonaetha pocotsiwa xua cueicueijan.

³⁻⁴ Yabara baru cui copare xua bara ichamona atene necaexanaewa tsane, nejume cowuntsixae Jesucristo icha xan ichin xua yabara cui copatan xua bara ichamona atene tana neexanaewa tsane. Poxonae baxua exaname, xam bara juta coyene ichim icha be soldadomonaepin ichi. Bapon ba atene exanatsi poxonae naba, xua peexanaexae pocotsiwa itorobatsi pia pentacaponaein. Soldadomonaepin ba dapocotsin aibi pon natsiexana piawa poxonae cataunxuae awiya naba exana ichamonaetha, tsipei bapon bewa baxua exanaena xua pon pentacaponaein peitorobixae. ⁵ Barapocotsi juta coyeneya ichi, pon ba xua penaxenacaewa. Bapon jopa itacupaetsi xua xeinaena pocotsiwa pematomatsiwatsi xua poxonae bichoina cuinaepona icha jopa beta yabara exanaeyo pocotsi coyene xua peitorobi coyenewa barapo penaxenacaewa. ⁶ Pon ba bichocono nacuita pabitha bapon ba copiya bewa xeinaena xua pocotsiwa copiya penawetsiwa. ⁷ Beta yabara nanta xeinare xuaunxuae catsipaebatsi. Pon jiji Pecanamataxeinaein cayawenaena xua yaputaename daxita.

⁸ Jesucristo yabara nanta xeinare. Bapon Jesucristo pon naexana xua David pia pemomoxi susato jiwi jiwana tatsi, po David Israel nacuapiwi itorobiya pia pepa peewatsinchi. Bapon Jesucristo equeicha Nacom Pexanto asu exana petupae cuiru coyene weya. Nacom pia pexeinya jume diwesi tatsi, po diwesi xua Cristo yabara, barapo diwesi cueicueijan jiwitha. ⁹ Barapo diwesi tacueicueijeixae daxota ichamona atene neexana, beya poxonae penaintotha necuba. Xan be pocotsin xua abe bichocono taexanaein nenatsicotane. Ichitha jopa itacupaetsi xua jume yancataba Nacom Pejume Diwesi

xua ajumetsurucuae pecana exanaewa tsane xua poxonae jiwi pecubi botha tana neetsixae. Tsipei awiya cataunxuae jiwi jume tane barapo diwesi. ¹⁰ Daxota jopa junuwinyo xua ichamonaе atene tana neexanaewa, matautano bara copatan xua bara moya necana exanaena baxua. Daxota baxua bara copatan pomonaе Nacom pia peitapetsi jiwi tatsi barapomonaе nexa, xua barapomonaе iru pecapanenebiyaenexa tsainchi xua Cristo Jesús capanenebiyaena. Poxonaе barapomonaе barapo diwesi xeinaena, po diwesi pecapanenebiyaе coyenewa, bapoxonaе muxuna xeinaena pexeinya peajuntuyarusuwa, po peajuntuyarusuwa ataya tsiteca xua Nacom pia nacuatheicha tatsi.

¹¹ Baraxue bara xainyei xua jei:

Icha copatatsi xua bara ichamonaе naca atene exana wajume cowuntsixae Cristo beya poxonaе naca tupa exana, icha poxonaе Cristo cana ichichi, bapoxonaе yawa muxuna jinompaeinchi Cristo xua pia nacuatheicha.

¹² Icha waxainchi awiya jume cowunta dubenanaebiyatsi xua poxonaе bequein ichamonaе naca atene exana, icha Cristo cana ichichi, bapoxonaе barapo coyenewa yawa muxuna waxainchi Cristo, baru canamataxeinaeinchi jiwitha, waitorobiya ewatsinexa tsane barapo jiwi.

Icha waxainchi itawetsiya yabara jeichichi Cristo: “Bapon jopa yaputaeinyo”, jeichichi, bapon xuya itawetsiya naca yabara jei tsane: “Bapomonaе jopa yaputaeinyo”, naca yabara jei tsane Cristo.

¹³ Icha jopa beta xaniwaicha jume cowuntsiya jinompaetsi, daichitha bapon cataunxuae

exana ducuaenaebiyaena pocotsiwa xua bayatha
 jiwi yabara paebatsi.
 Baxua exana, tsipei Nacom jopa itacupaetsi xua
 exana pocotsiwa jopa be pia cuiyiyo tatsi.

Meje yabara xua pon beta petanacuichin xua ichun beta
 petanacuichiwatsi

¹⁴ Xuaunxuae catsipaebatsi baraxua paebare ichamon-
 aetha yawano cui itorobare baraxua barapomonaе Na-
 com peitabaratha tatsi. Jande barapomonaetha: “Jopa
 yabara pana najume matsontsonoba exanaeinde xua po
 diwesin ichamonaе pepaebixae”, jande. Barapo penajume
 matsontsonobiwa barapo coyenewatha bapana jopa naca
 yawenaе. Barapo coyenewa saya abe cana exana pomon-
 aetha pomonaе jume tane. ¹⁵ Exande daxita pocotsiwan
 pexanepanaе coyenewa xua Nacom nexa, xua Nacom
 jinya necacui taenexa xua bara beta tanacuitame Nacom.
 Bapoxonaе xam jopa nayabara acauram tsane pocotsiwa
 xua beta xaniwaicha necaunutsiya paebixaem Nacom
 Pejume Diwesi, po diwesi pejume xainyei jume. ¹⁶ Jopa
 yabara najume matsontsonoba exanaeinde po jumein
 xua pejumexaei, po jumein xua saya yabara cueicueije
 pocotsiwa xeina barapo cae pin nacuathe, po jumein xua
 bapana jiwi jopa yawenaetsi. Tsipei pomonaе bapoc-
 otsiwan paeba, eexanapona pocotsiwan abe peexanae
 cuiru coyenewan. ¹⁷ Barapomonaе abeya pia pecuidubi
 coyenewan tatsi taju nayoyotapona, icha be ichi xua
 tsuweto xua bupana putsuna xua beya taju putsuna pona.
 Barapocotsi coyene xua taju nayoyotapona, exanabe pon
 pewun Himeneo iru pon pewun Fileto. ¹⁸ Baraponbe jume
 naitematabe pocotsiwa pexainyei coyenewa. Baponbe
 naerabiya jeibe: “Bayatha Nacom nacui weta xua asu
 exana, xua jiwi equeicha jopa asu peexanaewa tsainchi

pomonaē bayatha werapa”, jei baponbe xua naeraba pae-babe. Baponbe ainya muxu cana exanabe ichamonaetha xua barapomonaē jopa xapain pejume cowuntsiwa tsane Nacomtha. ¹⁹ Nacom pia pexainyei coyenewa, peayapusa, xua icha cui coyeneya jopa naexanaeyo. Barapon Nacom pia pexainyei coyenewa tatsi jeye: “Nacom pon jiwi Pecanamataxeinaein yaputane pomonaē piamaexae tatsi”, jei. Matautano equeicha jeye: “Daxita pomonaē xua nawun duba xua jei: ‘Paxan Cristobaru pan, pon jiwi Pecanamataxeinaein’, jei, bewa barapomonaē naitematsina abe peexanaē cuiru coyenewan”, jei Nacom pia pexainyei coyenewatha.

²⁰ Botha ba ichaxota pin bo, barapo bo xeina penain coroton pocotsiwa pewun oro nain, yawano icha penainwan pocotsiwa pewun plata nain. Matautano ba muxuna xeina napae coroton. Matautano ba xeina tsorobo coroton pocotsiwan be juruwaton. Po coroton xua pexeinya coroton, barapo coroton pecanamatawenonaenexa penabarū itata weiweinae matakabintha. Po coroton xua saya pexeinya coroton aibi, barapo coroton pecanamatawenonaenexa daxita matakabintha. ²¹ Bara jutiya ichi, icha pebin ichichipa exana xua pocotsiwa pexanepanae coyenewa pon jiwi Pecanamataxeinaein nexa, bapon bewa naitematsina abe peexanaē cuiru coyenewa xua Nacom pejuntu coyene xanepana exanaenexa bapontha. Bapoxonaē bapon itacupatsi xua peexanaewa daxita carepaya coyenein pocotsi coyenein Nacom tsita xanepanatsi.

²² Xam naitemare pocotsi coyenewan pewowi exana xua poxonaē abe exana. Exana ducuaenaebiyama pocotsiwa pexeinya juntu coyenewa. Matautano beta jume cowunta ducuaenaebiyama. Matautano antobe tsurucuaenaebiyama Nacom, matautano jiwithano. Matautano junte ma popona ducuaenaebiyama. Xam itapeta na-

puna ponde pomonae peꝓntu coyene xanepanaewi poxonae Nacomtha tsipaeba pon jiwi Pecanamataxeinaein. ²³ Naitemare po peyabara najume matsontsonobiwa jopa xapain wnaeyo xua jopa xapain peyaputae coyenewiyo, tsipei xam yaputaneme xua jiwi barapocotsi jumetha ba yabara naba. ²⁴ Pon nama Nacom pon jiwi Pecanamataxeinaein, amanaya tanacuitatsi jopa bewa bapon jume matsontsonobi tsane. Jame bewa bapon xanepanaya wnaeya exanaena xua daxita carepaya coyene cuintha daxita jiwitha. Matautano bewa bapon beta cuidubina ichamona. Matautano bapon bewa saya juntea poponaena poxona bequein abe taexanatsi ichamona. ²⁵ Matautano bapon bewa saya bewayo juntu coyene wnaeya muxuwetsina pomonaetha pomonae peacuitafaetabiwichi xua bapon xainyeya pia pecuidubiwa ichamonaetha. Matautano bapon bewa abu ewatsina xua icha metha Nacom copatsina xua barapomona. icha juntu coyene pexeinaenexa xua peauraxae xua abe exana. Matautano barapon bewa abu ewatsina xua barapomona peyaputaewa tsane pocotsiwa xua Nacom pia pexainyei coyenewa tatsi. ²⁶ Poxona baxua yaputaena, bapoxona barapomona, pomona copiya pemuxufebiwi itacypaeinchi xua beta nanta xeinaena peꝓntu coyenewatha. Barapomona yaputaena xua deta cou eexanapona pocotsiwa caurimona pia pentacaponaein tatsi jujuta, xua pocotsiwa abe peexanaewa, pocotsiwa bapon peitorobixae. Bapoxona barapomona itacypaeinchi xua panenebiyaena bapon weya, matautano xua tamropata notarucypaena xua exana pocotsiwa Nacom ichichipa.

3

Meje yabara xua po coyeneya jiwi exanaena poxona po

matacabitha opi ducuaena

¹ Ichichipan xua neyaputaewa tsane xua poxonae po matacabintha opi dubenaena barapo matacabin jiji taayapube tsainchi. ² Jiji barapo matacabintha bichocono pia coutha naantobe tsane. Barapo jiji bichocono Ꞇ pitaparaxixichi tsane. Yawano matautano aebina ichamonaetha. Matautano bichocono atsaca tsaneno. Matautano biataenano ichamonaetha, matautano Nacom biataeinchi. Matautano barapomona jipa jume jejei tsaibi tsane paxeiwi. Matautano barapomona jipa wecobe jacobiya noteibiyo tsane poxonae ichamona catsibeiba. Matautano abe yabara nanta xeineibina pocotsiwa Nacom piawa tatsi. ³ Matautano piamona jipa tsita xeinae tsane peantobe coyenewa. Matautano ita aenae-aenei tsurubenanaebiyae tsane ichamonaetha. Matautano yopita dubenanaebiyaena xua ichamona pocotsiwa abe peexanaewa. Matautano jipa itacupae tsainchi xua najuntꞆ coyene itorobina xua xanepanaya peexanaewa tsane. Matauta barapomona bichocono anaepanaena xua ichamona beinchi. Matautano barapomona bichocono aichaxaibi tsane pocotsiwan xanepana. ⁴ Barapomona pomona jiji pecaenaetsi jiji tsane. Jipa matha copiya yabara nanta xeineibi tsane pocotsiwan xua exana. Barapomona pia coya nacayabara nanta xeinaena xua peainya cui jiji tsane. Saya barapomona itapetsiya naitomatsina xua pocotsiwa cui xeica penaexanaewa. Barapomona naitematsina pocotsiwa Nacom pia pexainyei coyene tatsi. ⁵ Bequein barapomona xanepanaya exana dubenanaebiyaena icha be ichi xua poxonae pomona xaniwaicha pejume cowuntsiwi, daichitha barapomona jipa xaniwaicha jume cowuntsiyo xua icha juntꞆ coyene pexeinaewa tsane.

Jipa bewa bara pocotsimona imoxoyo napuna pon-

aem xua barapomonaē necuiyainwam. ⁶ Barapomonaē jiwana pomonaē bom̄x̄n̄tha pateibina muxujainyabeib-inchi yab̄xi, po yab̄xi jinompa barapo bom̄x̄n̄tha, po yab̄xi xua anacaura xua penacui yaputaexae xua abe exana bayatha. Barapowaxi awiya came jopa xanepanaya exanaeyo, poxoru saya exana pocotsiwa pia coutha ichichipa exana. ⁷ Barapo yab̄xi jume naitaewata nawita, daxita carepaya po coyenein xua jiwi paeba, bara bequein jopa xanepanaya paebiyo. Daxota barapo yab̄xi jopa itac̄paetsi xua peyaputaewa pocotsiwa xua Nacom pia pexainyei coyenewa tatsi. ⁸ Caena bayatha pon pew̄n Janes, ir̄ ich̄n̄ pew̄n Jambres, baponbe mara pexeinaeinbe, baponbe cui matawentabe Moises-tha, xua Moisés pia peexanae coyenewatha. Icha baponbe ichi, barichi barapomonaē yabara jume matawenta Nacom pia pexainyei coyenewa tatsi. Barapomonaē saya yabara nanta xeina nawita pocotsiwa peabe coyenewa. Barapomonaē taseicatsi pejume cow̄ntsiwa, po pejume cow̄ntsiwa pexainyei jume. ⁹ Barapomonaē jopa beta dubenanaebiyae tsane, tsipei daxita nacuanpiwi cui yaputaena xua barapomonaē apara pomonaē jopa xanepanaya peexanaewi, icha be ichi poxonaē caena bayatha jiwi cui tane xua Janes ir̄ Jambres jopa beta exanaeyobe.

Meje yabara po diwesi xua Pablo najume wetsiya paeba poxonaē Timoteo itorobatsi

¹⁰ Ichitha xam bara beta exanaponame pocotsiwa tacuidubiwa. Matautano necui taneme xua bara beta poponan. Matautano necui taneme xua tacoutha yaputan pocotsiwa taexanaewa tsane Nacom nexa. Matautano necui taneme xua bara beta jume cow̄ntsiya poponan Nacomtha. Matautano necui taneme xua saya awiya beta

juntema poponan poxonaē bequein ichamonaē jopa xapain necana exanaeyo. Matautano necui taneme xua bara antobeya poponan jiwi, matautano Nacomtha. Matautano necui taneme xua bara awiya Nacom tanacuitan. ¹¹ Xam yaputaneme xua jiwi bichocono abe necana exana tajume cowantsixae Cristo. Matautano neyaputaneme xua jiwi bichocono atene neexana Antioquia tomaratha, Iconio tomarathano, Listra tomarathano. Ichitha pon jiwi Pia Pecanamataxeinaeinchi neyawena xua necapanepa barapomonaē pia xainya weya. ¹² Bara xaniwaicha, daxita pomonaē ichichipa xua najuntū coyene xanepana exana dubenanaebiya Cristo Jesthā, barapomonaē irū atene exanaeinchi ichamonaē. ¹³ Ichitha pomonaē peajuntūcoyenebe jiwi, irurū pomonaē pemuxujainyabi jiwi, daxita barapomonaē bichocono abe eexanaponaena beyacaincha xua copiya. Barapomonaē muxujainyabiya canamataxeina ichamonaē, xua abe peexanaenexarū, matautano xua barapo ichamonaē irū xuya pemuxujainyabiya canamataxeinaenexa ichamonaē, xua abe peexanaenexarū.

¹⁴ Ichitha xam awiya beta exana ducuaenaebiyama pocotsiwa xua nacuidubame, xuano xua bichocono nejume cowantsiwa. Xam bayatha yaputaneme pomonaē xua cacuiduba barapo coyenein, pomonaē pejuntū coyene xanepanaewi. ¹⁵ Poxonaē pexuyotham yaputaneme Nacom Pejume Diwesi. Barapo diwesi itacupatsi xua necacuidubiwa xua necacapanepaewanexa abe jinya nexanaē cuiru coyene weya nejume cowantsixae Cristo Jesús. ¹⁶ Daxita carepaya Nacom Pejume Diwesi tatsi, barapo diwesi Nacom ayapusū diwesi exana. Daxita barapo diwesi xanepana xua jiwi pecuidubiwa tsainchi. Matautano daxita barapo diwesi xanepana xua jiwi yaputane peexanaenexatsi poxonaē abe ex-

ana. Matautano daxita barapo diwesi xanepana xua jiwi pemuxuwetsinexatsi xua xanepanaya peexanaewa tsane. Matautano daxita barapo diwesi xanepana xua jiwi peyawenaenexatsi xua pejuntũ coyene xanepana dubenanaebiyaenexa Nacomtha. ¹⁷ Barapo diwesi jiton xanepanaya canacui weta exanatsi xua beta peexanaewa tsane pon Nacom piamonae jiwana jiton tatsi. Barapo diwesi daxita coyenein xeina xua barapon nantawenona, pocotsi coyeneintha xua bapon Nacom petanacuitsinexatsi, daxita carepaya po penacuichiwan xanepana.

4

¹ Nacom peitabaratha tatsi yawa Cristo Jesús peitabaratha tatsi, baponbe peitabaratha tatsi caitorobatsi. Bapon Cristo Jesús patopaetsica be pon jiwi itorobiya pia pepa Peewatsinchi. Matautano bapon yabara paebina jiwi xua penatsicuentisiwa xua abe peexanaexae, pomonae xua anoxuae cataunxuae asũ jinompa, irũno pomonae xua bayatha werapa. ² Caitorobatsi xua cueicueijande Nacom Pejume Diwesi. Beta jume daunweya cueicueijam tsaibinde Nacom Pejume Diwesi poxonae jiwi ichichipa cajume taibina, matautano poxonae bequein jiwi jopa ichichipaeyo xua necajume taewa. Barapomonae jũntũ coyene yaputane exande xua barapomonae petaseicaewatsi pejuntũ coyene xanepanaewa Nacomtha. Matautano barapomonae yabara muxuwere abe pia peexanae cuiru coyenein tatsi. Matautano barapomonae jũntũ coyene cui tsacabare xua Jesucristo pejume cowantsiwa tsainchi. Matautano bapana barapomonae jopa tsita xeinaeinde peaitaconaewa. Matautano bapana jopa nacui copatsim tsane xua necuidubaponaewa barapomonae, xua bequein barapomonae jopa Jesucristo pejume cowantsiwichi

taetham tsane. ³ Tsipei jopaena matabi poxona po matabitha jiwi jopa jume cowuntsi tsane barapo pexainyei cuidubi jume. Barapomona saya ɱ jeichina po pecuidubiwi saya cuiduba pocotsiwa xua jiwi ichichipa jume tane. ⁴ Barapomona saya naitemapenta xua aichaxaibi pejume taewa pocotsiwa pexainyei jume. Saya barapomona ɱ jume naitaewatsina ainya diwesin, po diwesin xua saya pejema diwesin. ⁵ Ichitha xam dotam. Najɱntɱ coyene babare xua neexanaeyainwa pocotsiwa barapomona exana. Jopa junuwinde xua ichamona poxona caatene exanaena nejume cowuntsixae Jesucristo. Ichitha xam exana ducuaanere jinya nenacuichiwa xua Nacom pia pexeinya jume diwesi necueicueije ducuaanetsiwa. Daxita wetsiya exanare pocotsiwa jinya netanacuichiwa Nacom.

⁶ Bara nama imoxoyo nebexubina tajume cowuntsixae Cristo. Matautano bara nama imoxoyo xua po mataqueitha tsane ponaein Nacom pia nacuatheicha. ⁷ Ajɱntɱcuiyapusɱya amanayaban caurimonaetha Jesucristo nexa, icha soldadomona ichi xua poxona amanayaba pia peaitafaetabiwichi. Bayatha nacui wetan pocotsiwa xua bayatha Nacom neitoroba, icha jiton ichi xua patopa poxona penaxenacaewa. Matautano jume cowuntsiya poponan Jesús, icha be pocotsi coyeneya ichi poxona jiton beta yapu eena pocotsiwa itorobatsi pia pecanamataxeinaeinchi. ⁸ Anoxuae ewatan po pentoma Nacom necatsina xua tajɱntɱ coyene xanepanaexae bapontha. Pon jiwi Pecanamataxeinaein, pon xua yatsicaewa xainyeya jiwi yabara paebatsi xua penatsicuentiwa xua abe peexanaexae, bapon pentoma necatsina po mataqueitha poxona bapon patopeicaena. Saya meisa jopa compa necatsi tsane, irɱ barichi tsainchi baxua catsibinchi pomona wɱnae ewatsiya ichichipa

xua pia pepatopaewa tsane bapon.

Meje yabara xua Pablo waba xua Timoteo wabatsi

⁹ Nainya nesiwa ponde poxonaē caitacupa. ¹⁰ Pon Demas, bapon nepunaxuba, tsipei bapon saya copei yabara cananta xeina nawita pocotsiwa po cae pin nacuathe xeina. Bapon Tesalónica tomara beya pona. Pon Crescente, bapon Galacia nacua beya pona. Pon Tito, bapon Dalmacia nacua beya pona. ¹¹ Meisa pon Lucas, bapon xote baru ecan. Wenawenande Marcos, cabaru dena tsane, tsipei bapon itacupatsi xua tana neyawenaewa tsane. ¹² Pon Tíquico bapon Efeso tomara beitorobian. ¹³ Poxonaē nesiwa denam, inta carenande po paparuwa aitiyu, po paparuwa cuentan pon Carpo, bapon pia botha tatsi Troas tomaratha. Diboronno inta carenande, yawa paperanno inta carenande xua inta ainya cui pocotsiwa.

¹⁴ Pon Alejandro, pon penain penacuichin, bapon inta abe exana. Pon jiwī Pecanamataxeinaein, bapon Alejandro pentoma catsinchi po pentoma po pecayabara matomatsiwatsi xua abe peexanaexae. ¹⁵ Dotam xua bapon, tsipei bapon aichaxaibi pocotsiwa po diwesin cueicueijeichi.

¹⁶ Poxonaē tacoutha nayabara jume yawenaeya cueicueijan pentacaponae wi peitabaratha, dapon aibi pon tana neyabara jume yawenaewa tsane. Daxita nepunapenta. Ichichipan xua Nacom bu jopa cabetsi tsane barapomonaetha xua tana nepunapentsixae. ¹⁷ Daichitha Nacom pon jiwī Pecanamataxeinaein, neyawena poxonaē bequein ichamonae nepunapenta. Bapon peantuyapusawa necata xua beta tacueicueijeinexa pijume diwesi xua pejume taewa tsane daxita pomonaē jopa judiomonaē naexanaeyo. Bapoxonaē Nacom neyawena xua jiwī jopa necabetsiyo xua tatupaewa. ¹⁸ Bapon pon

jiwi Pecanamataxeinaein, bapon necana exana xua tapanepaewa daxita carepaya abe peexanae cuiru coyenein weya, xua daxota patopaein pia peitorobi nacua beicha. Barabũ jiwi ataya wũnae jainchina Nacomtha. Je bara ichi tsane.

Meje yabara xua Pablo najume wetsiya paeba

¹⁹ Inta jacobare powa Prisca, irũ pia pebin tatsi, bapon Aquila. Irũ inta jacobare pon Onesíforo piamonae matabũxũyo tatsi. ²⁰ Pon Erasto bapon eca Corinto tomaratha. Pon Trófimo, bapon cuenta ponan Mileto tomaratha yaitama atene. ²¹ Jũjũre xua patopare xua pewũnaeya poxonae beya awũbo tsane. Pon Eubulo, irũ pon Pudente, irũ pon Lino, irũ powa Claudia, irũ daxita pomonae pejume cowũntsiwi, daxita barapomonae cajacoba.

²² Barabũ Jesucristo, pon jiwi Pecanamataxeinaein cabarũ poponaena. Barabũ Nacom amanayiya cayawenaena jinya necaantobexae.

Baja Pablo.

Nacom Pejume Diwesi po diwesi pena jume diwesi xua
Jesucristo yabara tinatsi
New Testament in Cuiba

copyright © 2010 Wycliffe Bible Translators, Inc.

Language: Cuiba

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuiba

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 14 Jun 2022 from source files dated 30 Nov 2021

e9c4c3a0-6dec-54a4-aaba-fb395e5eddc7